

30. april 2015

Innuttaasut pisariaqartitsilernerni ukioq kaajallallugu aalajangersimasumik kigutigissaasoqarfiunngitsuni najugaqartut erngertumik suliaritittariaqartut isumagineqarfissaminnut qaninnermut angalanissaminnut akiliutissaannik ikiorserneqarsinnaaqqullugit, Peqqinnissaqarfiup sullissineri il.il. pillugit Inatsisartut peqqussutaata nr. 15, 6. november 1997-imeersup allannngortinnissaannik Naalakkersuisut peqquneqarnissaannik Inatsisartut aalajangiiffigisas-saattut siunnersuut.

(Inatsisartunut ilaasortaq Juliane Henningsen, Inuit Ataqatigiit)

Nunatsinni kigutileritittarneq sumi najugaqarneq aallaavigalugu periarfissatut neqeroorutigineqartut assigiinngitsorujussuupput.

Illoqarfinni anginerusuni kigutileritinnissamut periarfissat atuupput naak ilaatigut illoqarfiit ilaannii piffissap ilaannaa periarfissiisoqartaraluartoq. Pitsaasunik kinguteqarneq peqqinnermut attuumassuteqarluinnarpoq, aamma taamaappoq peeqqissumik qaneqarneq alleroqarnerlu.

Nunatsinni sumiiffippassuit kigutini pinartumik pisoqartillugu imaaliallaannaq ornitassaqaanngitsut amerlapput, tamannalu aamma siammasissumik nunasseriaatsitta peqqinnissap tungaatigut sullinneqarnermi ilaatigut unammillernartortai tassuunakkut ersaripput. Aamma taamaappoq illoqarfiit kigutilerisumik periarfissaasut iluanni kigutininik sianiutimut qanippallaalersimasumik inissisimasuni kigutaarsiinnartarneq.

Kigutileritittarnermut nalunaarummi takuneqarsinnaavoq nalinginnaasumik suliaritinnermit anner-tunerusumik suliarineqarsinnaaneq periarfissaanngitsoq, imaluunniit nalunaarummi allasimasut naapertorlugit: Peqqinnissaqarfiup nukissai akissaatillu naammanngippata, neqerooruteqartoqar-sinnaanngitsoq. Tamatumalu malitsigaa kigut immikkut suliarineqartariaqalersimappat neqeroorut tunniunneqarsinnaasoq tassatuaasoq kigutaarsineq, naak kigutip tamuffasitut pigiinnarnissaa sumiif-finni immikkut akiliuteqarluni namminersortumut suliaritinnissaa periarfissaappat attatiinnarneqar-sinnaagaluartoq. Inuppassuit sineriammi allamik periarfissaqaannginnertik aallaavigalugu kigutaa-rukkiartuinnartarput.

Kigutit inuup naleqassusaannut annertoorejussuarmik sunniuteqarput, taamaappoq aamma inuk timimigut peeqqissuussaguni nerisaminut pitsaasunik tamuffaseqarnissaa.

Nuannaarutigaarput siunnersuuteqartup inuit ataasiakkaarluta kigutitsinnik paarsilluarnissarput uani aamma iserfigimmagu, ullumikkullu inuiaqatigiit ingerlanneqarnitsinni annertoorejussuarmik pina-veersaartitsinerup iluani pitsaasunik kiguteqarnissap meeqqat kigutitaaqqaarneraniit annertuumik ingerlattarmassuk.

Siunnersuuteqartup ujartugaa tassaavoq sumiiffinni kigutilerisoqarfiunngitsuni pinartumik piso-qariataartillugu kigutilerisoqarfiusumut ornigunnermi angallannikkut aningaasartuutininik taarsiivigineqarsinnaaneq.

Naalakkersuisut akissutaanni erserpoq periarfissaq taanna pinartumik pisoqartillugu periarfissaa-reersoq, taamaammat Naalakkersuisut oqariartuutaat siunnersuutillu itigartinneqarnissaannut inner-suussinerat paasilluarparput, siunnersuutillu inatsimmi periarfissarititaasup iluani atuutereermat matumuuna itigartinneqarnissaa inassutigaarput.